



Broj: 05/1-50-15-26-19-6/22

Sarajevo, 12. 12. 2022.

IZVJEŠTAJ

sa sastanka članova Nezavisnog odbora Parlamentarne skupštine BiH kao nezavisnog tijela policijske strukture BiH s rukovodstvom Granične policije BiH

Sastanak je održan 14. 11. 2022, s početkom u 13 sati, u prostorijama Granične policije BiH u Sarajevu. Prisustvovali su: Zoran Galić, direktor Granične policije BiH, Fahrudin Halač, zamjenik direktora Granične policije BiH, Dragan Kulić, pomoćnik direktora za organizaciju i operacije, Enes Obraliya, predsjednik Nezavisnog odbora, Mate Miletić i Milan Stanić, članovi Nezavisnog odbora.

Direktor Granične policije BiH Zoran Galić poželio je dobrodošlicu članovima Nezavisnog odbora i rekao da je na raspolaganju za sva eventualna pitanja.

Enes Obraliya, predsjednik Nezavisnog odbora, ukratko je obrazložio razlog posjete. Rekao je da je posjeta organizirana u skladu s dogovorom s posljednje sjednice Nezavisnog odbora, ali i u skladu s Planom i programom rada Nezavisnog odbora za 2022. godinu, s ciljem održavanja kontinuiteta saradnje s policijskim agencijama iz svoje nadležnosti.

Također, naglasio je da je akcenat današnjeg razgovora na problematici koja se tiče migranata i ilegalnog prelaska granice kao i na aktivnostima koje Granična policija BiH preduzima i planira preduzimati u narednom periodu.

Kad je u pitanju migrantska kriza, direktor je informirao članove Nezavisnog odbora da se u proteklom periodu dogodio pad priliva migranata u BiH. Međutim, od augusta mjeseca ove godine nastupio je nagli skok dolaska migranata, a najviše državljana iz Afganistana i Burundija. Razlog za to bi se mogao ogledati u činjenici da je susjedna država - Republika Srbija - imala bezvizni režim za te dvije zemlje. Međutim, od prije mjesec dana vratili su vizni režim za Burundij, što se itekako osjeti kad je u pitanju tranzicija tih državljana kroz Bosnu i Hercegovinu. Dalje, direktor je istakao da su suočeni s problemom migracija pribjegavali mehanizmu unutrašnje preraspodjele, tj. pojačanim angažiranjem policijskih službenika na istočnu granicu. Sve to je proizvelo određeni broj tužbi policijskih službenika prema Graničnoj policiji BiH koji su na kraju, pred sudom, dobili sporove protiv Granične

policije BiH, a što je rezultiralo obavezom plaćanja određenih troškova koje je bila dužna platiti Granična policija BiH.

Direktor je naglasio da ima dobru saradnju sa ostalim policijskim agencijama u BiH, a što se tiče saradnje s Ministarstvom sigurnosti BiH, ocijenio ju je izuzetno dobrom, pogotovo u zadnjem periodu, navodeći da u najkraćem roku rješavaju sve probleme, imaju otvorenu i bez zadržke komunikaciju.

Kada je u pitanju saradnja sa Službom za poslove sa strancima, s obzirom da s njima najtješnje sarađuju po pitanju migranata, direktor je istaknuo da je dobra, ali da se s vremena na vrijeme javljaju određeni problemi tehničke prirode. U tom smislu direktor je istaknuo da je formirana radna grupa koja radi na izmjenama Zakona o strancima. Jednim od prijedloga izmjena tog zakona propisivalo bi se da inspektori Službe za poslove sa strancima mogu obavljati određene poslove na samoj granici, međutim, o tome još uvijek nemaju saglasnost i jedinstven stav.

Direktor je istaknuo i da su u prvih devet mjeseci ove godine uputili više od 2.200 informacija drugim institucijama u BiH, uključujući MUP-ove entiteta i tužilaštva.

Na upit članova Nezavisnog odbora šta je sa „spornim konkursom“ o prijemu kadeta u Graničnu policiju i u kojoj je fazi, direktor je informirao da se određeni broj predmeta po izjavljenim žalbama vodi pred Odborom za žalbe policijskih službenika, kao i pred Tužilaštvom BiH, te da za daljnje postupanje čekaju njihovu odluku.

Što se tiče kadrovske popunjenosti u Graničnoj policiji BiH, rukovodstvo je istaklo da na današnji dan, kao nikada do sada, nedostaje 507 policijskih službenika te su upozorili da će se sve policijske agencije, pa samim tim i Granična policija BiH, susresti s velikim brojem odliva kadrova jer sve one postratne generacije (1995. i 1996. godina) uskoro odlaze u penziju. Samim tim pojavila se i bojazan u vezi s prenošenjem znanja na mlađe generacije, ali su istakli da rješenje vide u novom Zakonu o policijskim službenicima BiH kojim bi se omogućila fluktuacija policijskih službenika s državnog nivoa na entitetski i obrnuto.

Dalje, informirali su članove Nezavisnog odbora da su, nevezano za sporni konkurs, osigurali sredstva za novi konkurs za 125 policijskih službenika i 25 mlađih inspektora za koji vjeruju da će biti raspisan sredinom decembra ove godine.

Što se tiče rezultata rada, direktor je istakao da su u prvih devet mjeseci ove godine zabilježena 44 djela krijumičarenja ljudi te da je u tim akcijama 80 osoba lišeno slobode (66 državljana BiH i 14 stranih državljana).

Na kraju su članovi Nezavisnog odbora naglasili da će i dalje, u okviru svojih nadležnosti, pružati podršku radu Granične policije BiH i poželjeli im mnogo uspjeha.

Sastanak je završen u 14.30 sati.

PREDSJEDNIK
NEZAVISNOG ODBORA
Enes Obralića